

S. MI D. N. D. PAVLI PAPAE V.  
D E C R E T U M

De certo Religiosorum numero cuiusq; Monasterio, Conuentui, ac Domui Regulari præfigendo.



Antiquissimus in Christo Pater, & Dominus Noster, Dominus PAVLVS Diuina prouidentia Papa Quintus,

Cum ex plurimis, ijsq; grauissimis Decretis, quæ fel. recor. Clemens VI II. ad regularem disciplinam restituendam, & augendam condidit, illud maximi momenti esse animaduertit, quod à Sacro Concilio Tridentino multò ante cautum etiam fuerat, vt is tantum Religiosorum hominum numerus in singulis Monasterijs, Conuentibus, & Domibus Regularibus constitueretur, qui, vel proprijs redditibus, & obventionibus, vel consuetis emolumentis, ac elemosynis ali commodè possent; magnamq; fortasse obseruantia regularis iacturam inde factam esse, quòd Ordinum Superiores illud exequi nimium distulerunt: vt, hoc etiam adhibito remedio, huiusmodi incommodo prospiceret, aditumq; ijs Prælati Regularibus præcluderet, qui plures ad suam Religionem admittentes, quam Monasteriorum & Conuentuum cen-

sus, elemosynæ, & qualitates ferant, non leuem subditis vitæ claustralis relaxandæ occasionem præbere videntur, Decretis, & præcepit, ac præsentis Decreti virtute præcipit, & mandat omnibus, & singulis Generalibus, Prouincialibus, Conmissarijs, Ministris, Præfidentibus, Abbatibus, Prioribus, Præpositis, Guardianis, Vicarijs, & quibuscunq; alijs Superioribus Monasteriorum, Conuentuum, & Domorum, quouis nomine nuncupentur, Ordinum, Congregationum, & Institutum, tàm Monachorum, quàm Mendicantium Regularium quorumcunq; existentium intra fines Italiae, & Insularum adiacentium, vt singuli, ad quos pertinet, in qualibet Prouincia, adhibitis duobus aut tribus Monachis, Fratribusq; sui Ordinis, vel Congregationis probatoribus, & rerum vsu peritioribus, bona immobilia, census, redditus, & proventus omnes, consuetas item elemosynas, & obventiones, tam communes Monasteriorum, Conuentuum, & Domorum eiusdem Prouinciæ, quàm etiam singularibus personis religiosis assignatas, seu permissas, in communem vsum deinceps conferendas, decem annorum diuersimodè habita ratione, diligenter ac maturè recognoscant, ijs omnibus detractis, quæ reparationes, præstationes, grandines, sterilitates, aliaue cuiuslibet generis onera consueuerunt absorbere; eaq; omnia scripto fideliter exarata idem Superior, cuius interest, in primo Capitulo, seu Cõgregatione Prouinciali coram tribus Iudicibus ab ipsomet Capitulo, vel Congregatione deligendis proponat, qui computatis huiusmodi redditibus, elemosynis, & obventionibus vniuersis, ac oneribus, vt superius detractis, sedulo examinent, quot religiosi homines in vnoquoq; Monasterio, Conuentu, & Domo regulari, iuxta regionis & proprii Instituti morem, victum, & vestitum in communi habentes competenter valeant sustentari; Tùm eorundem bonorum, reddituum, elemosynarum, & onerum præcisam notã ipsimet Congregationi, Capituloq; Prouinciali exhibeant, vt in illo diligenter omnibus discussis, cuiusq; familiae Conuentus, Monasterij, & Domus regularis quouis nomine nuncupatae in singula quaq; Prouincia certus earum tantum perlonarum numerus communi Patrum Capitularium voto præfigatur, quæ redditibus, elemosynis, & obventionibus, vt superius, sufficienter ali possint. Ne verò Superiores, qui id præstare debent, ferius aut remissius, quàm par est, muneri suo satisfaciant; Mandauit, ac mandat Sanctitas Sua, vt infra annum à die dati præsentis Decreti computandum, omnia hoc de genere Capitulariter gesta in autenticam formã redacta ad Congregationem Reformationis Apostolicæ singuli mittant, numerumq; familiae singulorum Conuentuum, Monasteriorum, & Domorum huiusmodi regularium, Capituli vel Congregationis Prouincialis sententia & auctoritate præfinitum iisdem Superiores Ordinum, Congregationum, & Institutorum quoruicunq; tam Generales, & Prouinciales, quàm locales omnes perpetuò seruari omninò teneantur: eos autem Superiores cuiuscunq; status, gradus, & conditionis existant, qui prædicta omnia præfixo termino non præstiterint, vel numerum huiusmodi præscriptum quouis modo augere præsumperint, priuationis omnium officiorum, quæ tunc tæporis obtinebunt, vocisq; actiuae, & passiuae, ac ad omnia sua Religiosis officia, & gradus inhabilitatis perpetuam pœnam eo ipso incurrere, atq; alijs etiam grauioribus ad Sanctitatis Sux, & Successorum suorum arbitrium infligendis pœnis lubiacere voluit, & declarauit. Vult præterea Sanctitas Sua per hoc Decretum eiusdem Congregationis Reformationis Apostolicæ Secretarij manu subscriptum, consuetisq; Almæ Urbis locis affixum, & publicatum omnes, & singulos Ordinum Regularium Superiores, ad quos spectat, perinde affici, ac si fuisset cuiuslibet personaliter intimatum. Non obstantibus Constitutionibus Apostolicis, priuilegijs, statutis, indultis, nec alijs contrarijs quibuscunq;. Dat. Romæ apud Sanctum Petrum die IV. Decembris M. D. C. V. Pontificatus eiusdem S. D. N. Anno Primo.

Ant. Seneca Refor. Apost. Secr.



